



UKA2020/42
22. oktober 2020
Mariane Paviasen

Nunatsinni tarnimikkut napparsimasut atugaat pillugit iliuusissat pitsanngorsarneqarnissaat siunertaralugu nuna tamakkerlugu iliuusissamik pilersaarummik Naalackersuisut UKA2021-mi saqqimmiusseqqullugit Inatsisartut aalajangiiffigisassaatur siunnersuut.

(Inatsisartunut ilaasortaq Mikivusuk Thomassen, Inuit Ataqatigiit)

Nunatsinni tarnimikkut napparsimasut atugaat pillugit iliuusissat pitsanngorsarneqarnissaa siunertaralugu nuna tamakkerlugu iliuusissatut pilersaarusiortoqarnissaanut Mikivusuk Thomassenip Inuit Ataqatigiinneersup siunnersuutaanut imatut oqaaseqaateqassaagut:

Nunatsinni tarnimikkut nappaammik atugaqartunut pitsanngorsaassagutta tarnikkut nappaateqarnek pillugu iliuusissatut pilersaarusiornissaq pinngitsoorneqarsinnaanngitsoq isumaqarpugut.

Tarnimikkut napparsimasut atugaat pillugit nuna tamakkerlugu atuuttussamik iliuusissamik pilersaarusiornermi, inuiaqatigiillu ataatsimut isigalugit innuttaasut atugarissaarnerulernissaannut iliuusissatut pilersaarusiornerep kingunerissammagu nappaammik nalaataqartut ulluinnarni atukkamikkut oqilisaanneqarnissaat.

Tarnimikkut napparsimasut kiffartuunneqarnerat sullinneqarnerallu malunnaatilimmik pitsanngoriaateqartinneqarumaartoq Inuit Ataqatigiit sulissutigerusuppaat. Taamaattumik nunatsinni tarnimikkut nappaateqartunut qanigisaasunullu ataqatigiissaakkamik isumaqarluartumillu ikiorsiinissamik neqerooruteqartuarnissaq qulakkeertariaqarpoq, aamma ineqarnikkut, suliffeqarnikkut sunngiffimmilu sammisassaqartitsinikkut periarfissat ilanngullugit – ataasiakkaat naleqarluartumik ataqqinassusilimmillu inuuneqarnissaat qulakkeerumallugu.

Meeqqat inuusuttullu tarnimikkut napparsimasut sullinneqarnerat pingaartinneqassasoq Inuit Ataqatigiit tungaanniit kissaatigaarput – minnerunngitsumik siusissukkut qanoq iliuuseqarnissaq periarfissiissutiginiarlugu suliniutinik ersarissunik sinaakkusiisariaqarpugut pilersitsillutalu. Siusissukkut meeqqat atugaat, tarnikkut naappaatigisinnaasaat paasineqarpata, iliuuseqajaartoqarneratigut kingusinnerusukkut tarnikkut nappaateqalersinnaaneq millisarniarlugu. Ullumikkut meeqqat atualereeraangata aatsaat ajornartorsiorsinnaanerat

INUIT ATAQATIGIIT

Inatsisartuni



paasineqartarpoq, tamannalu allanngortittariaqarparput meeqqap ineriartornermini tarnikkut napparsimassutigilersinnaasaat siusissumi paasineqarsinnaanngortillugit.

Tarnikkut nappaateqalernerup siusissukkut paasineqarnissaa qulakkeerniartaria-qarpoq, qanigisaasut ilaqutaasulluunniit pisariitsumik pasitsaassinertik pillugu peqqinnissaqarfimmut saaffiginissinnaaneratigut. Piffissaq sivikitsoq atorlugu tarnip nakorsaanic misissortissinnaanissaq peqqinnissaqarfiup qulakkeerniartariaqarpaa. Tarnikkut napparsimasoq ajornartorsiortorujussuanngoraangat aatsaat paasineqartarnera arlalitsigut takusarparput. Tamannalu ilaqutaasunut ernumarujussuartsisarpoq, annikilliorujussuartsillunilu, tamannalu minnerpaaffianiitinniartariaqarparput.

Tarnikkut nappaateqalernissamut qanillitaasinnaasut Inuit Ataqatigiit taanngitsoosunnigilaat. Imigassamik aanngajaarniutinillu atuinerup millisartuarnissaa pingaartikkatsigu, imigassamik aanngajaarniutinillu atuinerit minnerpaaffilerniarlugit iliuuseqartariaqarpugut. Tarnimikkut nappaateqartut arlaqaqisut imigassamik aanngajaarniutinillu aallaaveqartarnerat miserratisinnaanngilarput. Tamannalu kommunit Namminersorlutillu oqartussat innuttaasut peqatigalugit iliuuseqarfiginiartuartariaqarpaat, iliuusissatullu pilersarusiortoqarneratigut suliniutit timitalersugassat ataqatigiissaakkamik aqqissuunneqarsinnaallutik.

Tarnimikkut napparsimasut eqqarsaatigalugit suliffeqarfiit akimorlugit suleqatigiilluarnissaaq Inuit Ataqatigiinnit pingaartipparput. Tarnimikkut nappaatillit ataavarnerusumik ikorfartorneqarnissamik isumassortariaqavissortut isumaginnittoqarfimmi, tapersersuisutut sullissisuni, peqqinnissaqarfimmilu sulisut suliffiit akimorlugit suleqatigiilluarnissaat pisariaqarpoq. Tarnimikkut napparsimasut pillugit pisortat qanoq iliornissartik pilersarusiorlugulu nalunngittariaqarpaat. Tarnimikkut napparsimasut pillugit pisortat akunnerminni suleqatigiinnerat ataatsimut siunnerfeqassaaq ataqatigiissaagaassallunilu. Inunnik isumaginnittut ikorfartuisullu sullissinermi qitiupput, tarnimikkut napparsimasunut isumassuilluarnissamut sinaakkutinik pitsaasunik patajaatsunillu pilersitsisariaqarpugut.

Tarnimikkut napparsimasut iliuusissatut pilersarusiuunnerisigut inunnik isumaginnittunik amigaateqarnerujussuaq, ikorfartuisullu taarserarnerujussuat pinaveersaartariaqarpoq, pikkorissaajuarnikkut ilinniarfissanillu periarfissiuussuarnikkut suliniutit patajaallisarneqarnissaat pinngitsoorneqarsinnaanngimmat.

Siunnersuut tamakkiisumik taperserlugu ataatsimiititaliamut susassaqtumut ingerlateqqipparput.